



**Broj:  
Sarajevo, 07. 08. 2008.**



**M E D I J I M A**

Predmet: Obavijest



**FBA: Nadzor nad poslovanjem Razvojne banke FBiH**

Nakon što je Agencija za bankarstvo Federacije BiH (FBA) ukinula dozvolu za osnivanje i obavljanje bankarskih poslova Investicijskoj banci FBiH d.d. Sarajevo (sva prava i obaveze ove Banke prenose se na Razvojnu banku FBiH, koja je osnovana kao posebna finansijska institucija), Vlada Federacije BiH je, na sjednici održanoj 6. avgusta 2008. godine u Sarajevu, u skladu sa obavezom iz Zakona o Razvojnoj banci FBiH, donijela Uredbu o kriterijima i načinu vođenja nadzora nad poslovanjem Razvojne banke Federacije BiH kojom se propisuju minimalni standardi za upravljanje kapitalom, upravljanje rizicima, upravljanje koncentracijom kreditnog rizika, poslovanje s osobama povezanim s Bankom, upravljanje rizikom likvidnosti, deviznim i operativnim rizikom i tržišnim rizicima.

Pomenuta Uredba reguliše i provođenje i održavanje sistema internih kontrola, interne i eksterne revizije, obim, oblik i sadržaj aktivnosti Banke za sprečavanje pranja novca i finansiranja terorizma, obavljanje platnog prometa i obračun i iskazivanje efektivne kamatne stope, te forme izvještaja za Agenciju za bankarstvo Federacije BiH koja i vrši nadzor nad radom Razvojne banke FBiH.

Naime, nadzor podrazumijeva kontrolu zakonitosti rada, akata i primjenu propisa kojima se reguliše rad Banke i poslovnih politika i procedura koje je Banka donijela. Pod nepravilnostima i slabostima se podrazumijevaju poslovanje mimo propisa i stanja i aktivnosti Banke koje predstavljaju nesolidno, nestabilno i suviše rizično poslovanje, bez obzira na to da li su njima prekršeni propisi, politike i procedure.

Nadzor se obavlja praćenjem izvještaja, informacija i podataka koje Banka dostavlja Agenciji za bankarstvo FBiH u formi propisanih izvještaja i neposrednim pregledom poslovnih knjiga, knjigovodstvene, kao i druge dokumentacije u Banci.

U slučaju da u toku nadzora utvrdi slabosti i nedostatke u poslovanju Banke, koji se odnose na kršenje odredaba zakona i uslova utvrđenih propisima, ovom odlukom Agencija će, u svrhu njihovog otklanjanja, postaviti određena ograničenja, zahtjeve i naložiti određene aktivnosti za sprečavanje daljnjeg pogoršanja stanja i poboljšanje procedura Banke za unapređenje poslovanja i upravljanje rizikom i naložiti Banci i odgovornim licima provođenje predloženih mjera, uz utvrđene rokove primjene.

Inače, propisano je da visinu naknade za nadzor Agenciji za bankarstvo FBiH utvrđuje njen Upravni odbor posebnom odlukom, uz konsultaciju sa Vladom FBiH.

**Ured FBA za informisanje**